

學海類編



第三十九册

歷代銓政要略

宋 浦城楊 億大年著

夫先王建國法天制官故勞大者其祿厚功多者其爵尊能治眾者其官大是以量其才用程其器能考之以言試之以職惟善是授共格于治者也而銓選之任衡鑑是司歷世以來資地尤重故曰周禮天官大宰掌建邦之六典以佐王理邦國其官卽今之吏部而職任頗異也又曰夏官之屬有司士大夫二人掌羣臣之版古書版爲班書或爲版名籍也歲登下其損益之數謂用功過黜陟者也辨其年歲

與其貴賤年數多少周知邦國卿大夫士庶子之數以

詔王理告王所尚以德詔爵有賢者之德以功詔祿功

然後詔以能詔事以久奠食能者成事乃食之王制曰

爵之位定然後乃今銓選之義矣漢丞相東曹主二千

石長吏遷除亦其事也成帝初置尚書四人六百石分

為四曹吏曹尚書典選舉又曰常侍曹主三公卿事後至

漢光武分為六曹常侍曹為吏部曹主選舉祠祀漢末

又改三選部專掌選舉事靈帝時以侍中梁鵠為選部尚書于此始見會名魏

改選部為吏部而主選事陳羣延康元年始建九品官人之法拜吏部尚書晉

與魏同宋時吏部尚書領吏剛定三公兆部四曹孝武

不欲威權在下大明二年分吏部尚書二人以輕其任

後還置三吏部尚書後魏北齊置吏部掌褒崇考功主

爵二曹後周置大冢宰卿一人屬官有吏部中大夫一

人領司勳上士等隋初復曰吏部尚書至唐氏建國吏

部尚書侍郎掌銓選之職掌天下眾官之選授凡職官

銓綜之典權衡殿最之法悉以咨之其屬有四曰吏部

主爵司勳考功冠于中臺盡總職務而奉行其制命凡

中外百司之事由于所屬皆質正焉其取士則以三類

觀其異一曰德行二曰才用三曰勞効德均以才才均以勞其優者擢而升之否則量以退焉所以正權衡明子奪抑貪冒進賢能也然後據其狀以覈之量其資以擬之五品以上皆名聞而制授焉六品以上常參之官則敕授晉供奉官及員外官監察御史其餘則各量資注擬置吏部尚書一人正三品龍朔二年改吏部尚書爲司列太常伯咸亨元年復爲吏部尚書光宅元年改爲天官尚書神龍元年復舊天寶十一年三月又改爲文部掌文官選事總判吏部司封勳考四曹事至德二載十二月復爲

吏部尚書侍郎二人正四品上周之天官小宰中大夫也隋煬帝置以二尚書之職唐朝因之武德七年二月省貞觀二年正月復置總章元年加一員龍朔二年改爲司列少常伯咸亨元年復爲吏部侍郎掌選補流內六品以下官是爲銓衡之任凡初仕進者無不仰屬選集之際勢傾天下列曹之中資位尤重光宅元年爲天官侍郎神龍元年復爲吏部天寶十一載三月爲吏部侍郎至德二年二月復爲吏部總章中添一員爲二員本員爲中銓新加員爲東銓永昌元年三月又加一員

聖歷二年五月減二員乾元二年八月改中銓為西銓
郎中二員晉魏已來妙于時選其他曹郎功高者遷為
吏部然而或有侍郎或有郎中或曰尚書郎或曰某曹
郎稱號不同所職同也齊謝朓王儉為吏部郎是也隋
初諸曹郎皆謂之侍郎煬帝三年分置六司侍郎唐初
改為選部郎中武德五年改為吏部郎中龍朔三年改
為司列大夫咸亨元年復舊又有員外郎二人從六品
上周官太宰屬官有上士今員外之職也宋百官階次
員外郎美遷為尚書郎隋開皇六年置一人煬帝二年

改為選部承務郎武德三年復舊加置一人一員判廢
置一員判南曹在尚書吏部為前行兵部次之遷入者以為
美自魏晉以來凡吏部官屬悉高于諸曹焉開元以前
以兵部尚書權位尤美則宰相多所兼領而從容衡軸
不自銓綜其選試之任皆侍郎專之尚書通署而已或
分領其事則列為三銓開元四年六月敕員外郎御史
并供奉官直進名敕授自此始
不在吏部尚書掌其一侍郎分其二尚書所掌謂之尚書銓
侍郎所掌為中銓一為
東銓各有印其尚書銓掌六品七品官選侍郎銓掌八品九
品官選景雲元年宋璟為尚書始相通與侍郎分職開

元十三年以封岳回選限逼宇文融請分置十銓尋罷之寶應初李峴爲江陵尹知江淮選舉置銓于洪州興元元年侍郎爲本曹尚書知江淮選舉置銓于洪州興元元年侍郎劉滋亦于江南典選以便于人復皆廢焉其東銓者貞觀元年京師穀貴始分人于雒州置選至開耀元年以關外道里迢遞河雒之邑天下之中始詔東西二曹兩都分簡畱放既畢同赴京師謂之東選其南選先以桂黃交黔等州都督府所奏擬士人首領任官未甚精選乃令五品以上強明清正官充南選使以補仍令御史

同往注擬其有應任五品以上官者皆使人供所管都督府相知其條景行藝能政術堪稱所職之狀開奏故謂之南選然或廢或置不常其任其小銓郎中員外主之謂之南曹延載元年加置聖歷三年省開元三年吏兵部各專定人判南曹尋又一人專判貞元元年又以二人同判十二年又一人判自唐至五代正官或闕竝以他官權領其條章之所改亦考課之所登降或公望久著或利辦無虛揚清直之聲有振拔之跡史策所載固可考而知也

陳羣立九品官人之法北齊九品各分正從國朝正一品太師太傅太保從一品少師少傅少保太子太師太傅太保正二品太子少師少傅少保正三品太子賓客不專授但為大臣加官兼官及贈官其餘官品俱見內外官職中

入流

通典曰隋制九品自太師始焉謂之流內國朝正從一品至九品謂之入流即流內也

未入流

通典曰唐有流外勳品自諸錄事及五省內史始焉國朝九品之外雜職官員謂之未入流即流外也

文散官

漢諸侯有功德優盛朝廷所敬異者賜位特進三公下隋文帝以為散官今正一品初授特進榮祿大夫陞授特進光祿大夫漢有光祿大夫今從一品初授榮祿大夫陞授光祿大夫正二品初授資善大夫陞授資政大夫加授資德大夫宋太宗改通議為通奉今從二品初授中奉大夫陞授通奉大夫加授正奉大夫隋散官有

通議正議大夫今正三品初授嘉議大夫陞授通議大夫加授正議大夫秦有中大夫大中大夫今從三品初授亞中大夫陞授中大夫加授大中大夫正四品初授中順大夫陞授中憲大夫加授中議大夫隋散官有朝議朝請今從四品初授朝列大夫陞授朝議大夫加授朝請大夫唐有奉議郎今正五品初授奉議大夫陞授奉政大夫從五品初授奉訓大夫陞授奉直大夫正六品初授承直郎陞授承德郎隋有承務郎宣德郎今從六品初授承務郎陞授儒林郎吏才幹出身曰宣德郎

唐有宣義郎宋有承事郎今正七品初授承事郎陞授儒出身文林郎吏才幹出身宣義郎隋有徵仕郎今從七品初授從仕郎陞授徵仕郎正八品初授迪功郎陞授修職郎從八品初授迪功佐郎陞授修職佐郎正九品初授將仕郎陞授登仕郎從九品初授將仕佐郎陞授登仕佐郎初授散官俱於三年之後照例陞授其加贈考驗本人生前功績合得加授者照例給與

武散官

周禮天子六軍軍萬二千五百人其將皆命卿蓋在國

稱大夫在軍稱將軍自晉獻公作三軍而公將上軍故有將軍之名今爲散官正從一品同文官正二品初授驃騎將軍陞授金吾將軍加授龍虎將軍從二品初授鎮國將軍陞授定國將軍加授奉國將軍正三品初授昭勇將軍陞授昭毅將軍加授昭武將軍從三品初授懷遠將軍陞授定遠將軍加授安遠將軍正四品初授明威將軍陞授宣威將軍加授廣威將軍從四品初授宣武將軍陞授顯武將軍加授信武將軍正五品初授武德將軍陞授武節將軍從五品初授武略將軍陞授

武毅將軍正六品初授昭信校尉陞授承信校尉從六品初授忠顯校尉陞授忠武校尉

文勲

周禮王功曰勲齊梁始有勲品本酬戰士其後漸及朝流楚寵官有上柱國唐以爲勲官今正一品左右柱國從一品柱國正二品正治上卿從二品正治卿正三品資治尹從三品資治少尹正四品贊治尹從四品贊治少尹正五品修正庶尹從五品協正庶尹凡文官一品至五品應合授勲者照依散官定議奏聞給授

武勳

後魏有柱國大將軍今正從一品同文勳秦有護軍都尉唐改上大將軍為上護軍大將軍為護軍今正二品上護軍從二品護軍漢武帝置輕車將軍唐置上輕車都尉及輕車都尉今正三品上輕車都尉從三品輕車都尉漢武帝置騎都尉唐置上騎都尉今正四品上騎都尉從四品騎都尉隋置文散官為驍飛雲武四騎尉今正五品驍騎尉從五品飛騎尉正六品雲騎尉從六品武驍尉凡武官一品至六品應合授勳者照依散官

守擬奏聞給授

封贈

武王克商追王太王王季故後代有追諡追尊之典兩漢逮今人臣亦有追贈之制漢宣帝思張賀掖庭收養封恩德侯此追封之始也國朝凡文官一品贈三代二品三品二代四品至七品一代各照見授職事依例封贈土官無封贈父祖例止給本人誥敕一品玉軸四軸二品犀軸三品抹金軸俱三軸四品抹金軸五六七品俱角軸五品已上授誥織用五色紵絲其前織文曰奉

天誥命用誥命之寶六七品授敕織用純白綾其前織文曰奉天敕命用敕命之寶俱用升降龍文左右盤繞正從一品曾祖母祖母母妻各封贈一品夫人正從二品祖母母妻各封贈夫人正從三品各封贈淑人正從四品母妻各封贈恭人正從五品宜人正從六品安人正從七品孺人曾祖母母加太字按漢崔篆母師氏通經學百家言王莽寵以殊禮賜號義成夫人如淳云列侯子復爲列侯母稱太夫人蓋漢制也

宗室祿米

親王唐制歲該米四千八百石絹四千八百匹絲四百五十斤宋制領節度使歲該穀二千四百石錢四千八百貫絹二百匹綾一百匹羅十匹絲五百兩今定米一萬石郡王唐制歲該米七百石田六十頃宋制領觀察使歲該米一千二百石錢二千四百貫絹二十匹絲五十兩今定米二千石鎮國將軍唐制歲該米六百石田五十頃宋制郡王子以下量材授官照官品高下給祿今定米一千石輔國將軍唐制歲該米五百石田四十頃今定米八百石奉國將軍唐制歲該米四百石田二

十五頃今定米六百石鎮國中尉唐制歲該米三百石
田十四頃今定米四百石輔國中尉唐制歲該米三百
石田八頃今定米三百石奉國中尉唐制歲該米一百
石今定米二百石公主及駙馬食祿二千石郡主及儀
賓食祿八百石縣主及儀賓食祿六百石郡君及儀賓
食祿米四百石縣君及儀賓食祿米二百石俱米鈔兼
支

公侯伯俸給

漢艾亡秦大侯不過萬家小者五六百戶則封國以戶

也唐封公侯無國土其加實封者則食其所封之戶分
食詣郡以租庸調給洪武初給官田用量原定糧租分數
收取後令公侯伯皆給祿米論功定數舊賜田還官永
樂二年令照文武官例米鈔兼支

文武官俸給

唐貞元四年定百官月俸僖昭之亂國用空闕天祐中
止給其半後唐孔謙以軍儲不充請減半數而支實錢
宋定非兼職皆一分實錢二分解支大明定文武官俸
正一品月支米八十七石從一品月支米七十四石正

學海類編
二品月支米六十一石從二品月支米四十八石正三
品月支米三十五石從三品月支米二十六石正四品
月支米二十四石從四品月支米二十一石正五品月
支米十六石從五品月支米十四石正六品月支米十
石從六品月支米八石正七品月支米七石五斗從七
品月支米七石正八品月支米六石五斗從八品月支
米六石正九品月支米五石五斗從九品月支米五石
俱米鈔兼支米入流月支米三石

吏員俸米

筆譚曰天下吏人素無常祿惟以受贓爲生熙甯三年
始制天下吏祿而設重法以絕請託國朝五府提控六
部都察院都吏布政司通吏月支二石五斗五府掾吏
六部都察院通政司太常光祿太僕寺應天順天府布
政司都司衛各令史大理寺胥吏國子監鴻臚寺府庫
局司牧局顏料局各府各司吏都察院太醫院各典吏
按察司鹽運司各書吏月支二石五府六部大理光祿
太僕寺國子監應天順天府布政按察鹽運都司衛各
典吏十三道巡按各書吏翰林院光祿寺各署欽天監

司歷太常祠祭署織染皮作鑄印惠民雜造鞏轡軍器抄紙印鈔寶源局內府庫石灰關各牧監會同館寶鈔鹽課龍江提舉司典牧營膳葦牧葦牲紀善典膳奉祀典寶審理工正良醫典儀理問千戶所五城兵馬布政按察鹽運斷事衛鎮撫長史司州縣各司吏月支一石俱米鈔兼支

廕敘

書皋陶稱舜曰賞延于世則廕敘自有虞氏始也漢二千石以上視事滿三歲得任同產若子一人爲郎國初

因前代任子之制文武一品至七品皆廕子一人以世其祿成化三年奏准在京一品以上官聽令一人送國子監讀書出若大臣果有勲勞於國出自特恩錄用子孫者不在此限

鬻官

沿革曰鬻爵賣官三代無有起於秦漢之權利通典曰漢文帝納晁錯言令人入粟六百石爵上造萬二千石爲大庶長漢武帝國用空竭募人入奴婢終身以爲郎靈帝懸鴻都榜開賣官路

試職

書曰明試以功唐武后凡舉人無賢不肖咸加擢拜大
置試官宋神宗改官制有行試守三等試未正命也階
高官卑稱行階卑官高稱守國初凡在京初入仕者試
職一年御史試職半年考堪實授

會推

國朝進退大臣皆出於宸斷成化開始有吏部會官推
舉之例其權遂歸於內閣

考滿

舜典曰三載考績三載黜陟幽明宋朝以考定勞一歲
為考四考而遷國朝凡京官歷俸三年五品以下從監
察御史考覈吏部覆考各以九年通考四品以上任滿
黜陟取自上裁外官三年考滿給由到部亦以九年通
考

休沐

史記李園事春申君謁歸故失期則假告已見於戰國
時矣漢律吏得五日一休沐言休息以洗沐也 唐永
徽三年以天下無虞百司務簡每至旬假許不視事以

寬百僚休沐然則休沐始於漢其以旬休始於唐也國朝正旦節放假五日冬至三元宵十日

豁宿

宋朝館閣每夜輪一人直宿如有故不宿則虛其夜謂之豁宿豁宿不得過五日即須入宿若遇豁宿不到直宿歷書腹肚不安故相傳爲害肚歷

致仕

書曰伊尹既復政厥辟告歸于王註謂告老致政事于君此臣下致仕之初也自周乃有大夫七十而致事之

禮

策免

漢成帝策免大司馬許嘉此策免大臣之始

德政碑

陸龜蒙曰古者懸棺而窆用木書之以表其功德因雷之不忍去碑之名由是而得自秦漢以降主有功德政事者亦碑之而易之以石失其稱矣此德政有碑之起也

生祠

渾于公爲縣吏曹決獄平郡中爲立生祠自三代以來
無生爲立祠者至此始見其事按史記萬石君傳慶爲
齊相舉齊國皆慕其家
行不言而齊國大
治爲立石祠

戒石銘

餘冬橐曰今之戒石四字銘爾俸爾祿民膏民脂下民
易虐上蒼難欺舊傳乃宋太宗書以賜諸郡縣者其辭
則摘蜀王孟昶之文也自是天下始有戒石亭考歐陽
集古錄稱唐明皇擇令一百六十三人賜以丁甯之戒
其後天下爲縣者皆以新戒刻石又知戒石不自宋始

蓋唐已有之特不見其辭耳

Blank page with vertical lines for text.

官爵志卷之二

明 嘉興徐石麒虞求輯

宗人府

周有宗正漢置官以序九族國初置大宗正院洪武二十二年改院為府設宗人令左右宗正左右宗人俱正一品首領官經歷司經歷正五品職專玉牒譜系之事初以親王領府事後但以勳戚大臣掌之而不備官

六部

國初因元制置中書省設右左丞相等官天下政事皆

學海類編
由之而出其屬有四部分治錢穀禮儀刑名營造之務
洪武元年始定吏戶禮兵刑工六部俱正三品衙門仍
屬中書省革陞六部尚書爲正二品左右侍郎二員正
三品首領官司務廳司務從九品屬官郎中一員正五
品員外郎一員從五品主事正六品按秦少府遣吏四
人在殿中主發書謂之尚書漢光武始分尚書爲六曹
各置侍郎一人秦以郎侍衛居中故曰郎中隋文帝於
尚書二十四司各置員外郎一人謂本員之外復置郎
也後魏於尚書諸司置主事令史隋煬帝但曰主事皆

吏長之名也

吏部

漢成帝置常侍曹光武改爲吏部今尚書卽周天官卿
也侍郎卽周少宰也所屬有四清吏司曰文選因隋選
部今掌天下文吏班秩品命曰驗封因唐司封今掌邦
之封爵曰稽勲因周司勲今掌邦國官人之勲級曰考
功因魏考功今掌文職官吏考課

戶部

吳有戶部今尚書卽周地官卿也侍郎卽周小司徒也

首領官照磨所照磨一員正八品檢校一員正九品所屬隋曰民部魏曰度支金部倉部今改爲浙江江西湖廣陝西廣東廣西山東山西福建河南四川雲南貴州十三清吏司各掌一布政司戶口錢糧仍量繁簡帶管直隸州縣每司內分民度金倉四科以領其事

太倉

秦漢大司農屬官有太倉令丞唐元宗以監察御史克太倉出納使梁改曰如京使取詩如坻如京之義今屬戶部郎中員外主之

戶部所屬

寶鈔提舉司提舉一員正八品寶鈔廣惠庫收各處解到鈔錢廣積收紵絲綾羅硝黃等物贓罰庫收籍沒官民家財追沒官吏贓物并錢鈔紵絲綾羅綢絹氈氊鐵皮絛布衣服花絨等物甲字庫收布匹顏料乙字庫收紵絲絛布胖襖袴鞋毛襖等物丙字庫收棉花絲絛等物丁字庫收銅鐵皮張蘇木等物戊字庫收軍器胡椒等物各大使正九品各副使從九品寶盈庫收貯絲紗羅綾絛綢絹布匹等物御馬倉南京龍江鹽倉檢校批

學海類編 卷之二 禮部
驗所張家灣檢校批驗所抄紙局印鈔局各大使副使
俱未入流

禮部

漢成帝置客曹隋爲禮部今尙書卽周春官大宗伯卿
也侍郎卽周小宗伯也所屬有四清吏司曰儀制因魏
儀曹今掌舉其儀制而辨其名數曰祠祭因晉祠部令
臺祭饗天文漏山國忌廟諱卜筮醫藥道佛之事曰主
客因周官今掌諸番朝貢等事曰精膳因北齊膳部今
掌邦國牲牢酒膳辨其品數

禮部所屬

鑄印局大使一員副使一員俱未入流教坊司唐高祖
置內教坊武后改爲雲韶府以中官爲使宋以伶人久
次者爲之今設奉鑾一員正九品左右韶舞左右司樂
各二員俱從九品

兵部

魏置五兵隋爲兵部今尙書卽周夏官大司馬卿也侍
郎卽小司馬也所屬有四清吏司曰武選因魏五部郎
曹今掌天下武職班秩品命曰職方因周官今掌天下

地圖及城隍鎮戍烽堠之政曰車駕因魏駕部今掌邦國輦車及天下傳驛廩牧曰武庫因魏庫部今掌邦國戍器儀仗辨其出入之數

兵部所屬

會同館大使一員正九品副使二員從九品南京典牧所提領一員正八品大使一員正九品典史一員大勝關大使一員副使一員俱未入流

刑部

宋置都官隋爲刑部今尙書卽周秋官大司寇卿也侍

郎卽周小司寇也照磨檢校品與戶同司獄司司獄六員從九品古屬有四曰憲部比部司門部都官部今改爲浙江等十三清吏司各掌一布政司刑名仍量繁簡帶管直隸州縣并在京衙門每司分憲比司門都官四科以領其事

工部

管有起部隋爲工部今尙書卽周冬官大司空卿也侍郎卽周小司空也所屬有四清吏司曰營繕今掌經營興造眾務曰虞衡因周禮虞衡之官今掌天下山澤而

辨其時禁曰都水因隋水部今掌天下陂池川瀆政令
曰屯田因晉今掌天下屯種政令

工部所屬

營繕所所正正七品所副正八品所丞正九品文思院
唐有文思院宋始掌工巧之事以時文思索故工作之
所號之織所皮作局顏料局鞞轡局寶源局大使俱正
九品副使軍器局大使俱從九品副使未入流大通關
提舉司龍江提舉司提舉俱正八品副提舉俱正九品
典史押分竹木局大使副使俱未入流

都察院

周官有御史秦有御史大夫漢御史臺有中丞以其別
在殿中掌蘭臺祕書外督部刺史內領侍御史北齊後
周不置大夫而以中丞爲臺主唐分爲左右臺大夫漢
武帝始有侍御史魏文帝始遣御史居殿中隋文帝始
有監察御史宋爲御史臺其屬有三院一曰臺院知雜
御史爲侍御史隸焉二曰殿院言事官爲殿中侍御史
隸焉三曰察院考察官爲監察御史隸焉國初置御史
臺後改爲都察院設左右都御史正二品左右副都御

史正三品左右僉都御史正四品職專糾劾百司辨明
冤枉提督各道及一應不公不法事首領官經歷正六
品都事正七品照磨檢校各一員司務二員司獄六員
品同戶刑其屬浙江等十三道監察御史正七品凡遇
刑名各照道分送問發落

御史差委

國朝宣德二年差御史各處清軍天順二年奏準三年
更替正統元年差御史提督南北直隸學校三年差御
史巡視鹽課十三年差御史巡視京城成化三年差御

史於陝西巡茶一年更代凡差委御史出巡追問審理
刷卷等事都御史具事自請旨點差

巡撫

永樂閒遣尙書侍郎少卿等官鎮守景泰閒因與巡按
不相統屬難以行事定爲都御史巡撫兼軍務者加總
督贊理掌糧餉者加總督兼理他如整飭邊備提督邊
關及撫治流民等項皆隨事異名若邊境有事又有總
督提督總制參贊贊理及經略巡視之名近例尙書侍
郎治事於外者兼都御史以便行事事畢而罷

通政使司

唐虞納言官也今通政使正三品左右通政正四品左右參議正五品職專出納帝命通達下情關防諸司出入公文奏報四方臣民實封建言陳情伸訴及軍情聲息災異等事首領官經歷正七品知事正八品

大理事

黃帝立后土辨乎北方故爲李理官也舜命皋陶作士七理官也秦置廷尉漢因之景帝復爲大理取天官貴人之牢曰大理之義梁爲秋卿後魏置少卿晉置丞唐

因之今卿正三品左右少卿正四品左右寺丞正五品首領官司務從九品其屬左右二寺左右寺正正六品卽秦廷尉正也左右寺副從六品左右評事正七品因隋官也職專審錄天下刑名凡刑部都察院司道罪有出入者依律照駁事有冤枉者推情辨明

太常寺

周禮春官職也秦曰奉常王者旌旗畫日月大事則建以行禮官主奉持之漢改曰太常尊大之義也後漢有卿隋有少卿秦有丞今卿正三品少卿正四品寺丞正

六品職專祭祀之事首領典簿正七品漢官也屬官博士正七品因秦官也協律郎正八品因後魏也贊禮郎正九品因漢治禮郎也司樂從九品神樂觀提點正六品知觀從八品犧牲所吏目從九品隋有郊社令漢文帝有籍田令唐有陵臺令今天地壇山川壇籍田孝陵長陵獻陵景陵裕陵茂陵各祠祭署奉祀各一員俱從七品祠丞各一員俱從八品

鴻臚寺

周官大行人秦爲典客漢改曰鴻臚鴻聲臚傳之也傳

贊道也隋有丞唐有主簿今卿正四品左右少卿從五品左右寺丞從六品首領主簿從八品屬官司儀署司賓署署丞正九品鳴贊序班俱從九品職專朝儀宣贊等事

光祿寺

漢有光祿勳梁改光祿卿今卿從三品少卿正五品寺丞從六品職專膳羞宴饗等事首領典簿從七品錄事從八品屬官大官珍羞良醢掌醢四署署正俱從六品署丞俱從七品監事俱從八品司牲司司牧局大使俱

從九品副使俱未入流

太僕寺

洪武初置太僕寺在滁州置北平遼東陝西甘肅爲行太僕寺永樂閒改北平稱太僕寺正統閒定滁州爲南京太僕寺按周官有太僕秦漢有丞梁有主簿今卿從三品少卿正四品寺丞正六品職專牧馬之事首領主簿從七品常盈庫大使未入流行太僕寺官品同

尙寶司

漢有符節令位次中丞領上符璽唐武后改爲符寶郎

今卿正五品少卿從五品司丞正六品職專寶璽符牌等事

國子監

國子周制也晉武帝初立國子學隋煬帝改爲監正官名祭酒皆一位之元長古者得主人饌則老者一人舉酒以祭地故以祭酒爲稱周封兄弟同姓成王時彤伯爲祭酒主親屬秦漢因之晉武帝始制國子祭酒國子博士助教隋煬帝置司業取樂正司業之義亦置監丞北齊置主簿今祭酒從四品司業正六品繩愆廳監丞

學海類編
正八品博士廳博士典簿廳典簿俱從八品典籍廳典
籍從九品掌饌廳掌饌未入流率性修道誠心正義崇
志廣業六堂助教俱從八品學正正九品學錄從九品
職專教化之事

翰林院

學士之稱始自漢晉而命官起於宋齊唐明皇始置翰
林院改供奉爲學士禁中亦有侍讀侍講學士至宋眞
宗始置二職於翰林明皇始置史館修撰編修今學士
正五品侍讀侍講學士從五品首領官孔目未入流屬

官侍讀侍講正六品五經博士正八品典籍從八品侍
書正九品侍詔從九品史官修撰從六品編修正七品
檢討從七品職專制誥史冊文翰等事庶吉士永樂閒
選二甲三甲中進士爲庶吉士隸本院命學士教之學
業成者二甲除編修三甲除檢討餘除科道部屬

翰林陞用

雙溪雜記云自來陞用六部堂上官不拘出身何衙門
初無內閣禮部必用翰林出身人之例成化宏治以來
吏部必用翰林一人禮部非翰林出身者不得陞入由

學海類編
是翰林人多陟顯要矣

大學士

學士無大稱唐中宗欲以崇寵大臣乃有大學士之名
唐至五代有文明殿大學士爲宰相兼職宋眞宗寵王
欽若罷政特置資政殿學士班在翰林上今設華蓋殿
武英殿文華殿文淵閣東閣大學士俱正五品班在本
院學士上永樂初簡命編修等官於文淵閣參預機務
謂之內閣漸陞至學士等官洪熙元年以輔導任重加
陞至師保及各部尙書侍郎職銜仍兼學士大學士又

添設謹身殿大學士以後或由他官入閣辦事者皆兼
學士大學士唐末有閣門使今閣門使正六品武英殿
承天門右順門待詔俱從九品

內閣權重

蹟綴錄云國初不設宰相永樂初乃設內閣選翰林六
七臣居之職知制誥日備顧對參決政機隱然相職而
官不過學士洪熙初始陞孤卿皆潛邸舊人

詹事府

秦官漢因之掌太子官唐始置少詹事一人以貳詹事

今詹事正三品少詹事正四品府丞正六品首領主簿
正七品錄事從九品屬官通事舍人按漢司隸官有功
曹從事史兼錄眾事東晉有通事舍人

左右春坊

周太子官有庶子唐始置太子諭德中允贊善漢丞相
府置司直今左右庶子俱正五品左右諭德從五品左
右中允正六品左右贊善左右司直郎俱從六品左右
清紀郎從八品左右司諫從九品

司經局

國語曰句踐爲夫差洗馬如淳曰前驅也晉太子詹事
屬官有洗馬八人掌太子圖籍經書漢蘭臺東觀藏書
有校書之職後以郎居其任故謂校書郎元魏始命爲
官齊集書省有正書官北齊始爲正字今洗馬正五品
校書正九品正字從九品凡本府官皆以東宮輔導侍
從爲職

中書科

秦始置中書謁者漢元帝去謁者字魏文帝改祕書省
爲中書省令爲中書令置通事郎後改爲中書侍郎隋

文帝中書令與侍中知政事爲宰相舍人本周官掌平
宮中之政晉初置中書舍人國初中書省設置省舍人
後革省爲科定中書舍人從七品職專書寫誥敕冊等
事

六科

古諫官秦有諫大夫後漢有諫議大夫唐分爲左右武
后置左右補闕拾遺宋太宗改爲左右司諫正言秦漢
別有給事黃門之職後漢有給事黃門侍郎左右給事
中以有事殿中故曰給事中今設吏戶禮兵刑工六科

爲諫官每科都給事中正七品左右給事中給事中俱
從七品職專參駁糾劾等事

六科廊

國朝六科本與尙寶司相鄰今工部委官製衣處猶稱
六科廊是也永樂閒失火遷出午門外今遂爲定居

近侍

叔園雜記云翰林院尙寶司六科官在前常朝俱在奉
天門上御座左右侍立故云近侍今在門下御道左右
云是太宗晚年有疾因女官扶持上下因退避居下遂

爲定位

行人司

周官有行人今設司正正七品左右司副從七品行人正八品職專用封葬祭宗室及出使外彝等事

太醫院

周有醫師上士下士秦漢少府屬有大醫令丞元置太醫院有使副判各一員今設院使正五品院判正六品首領吏目從七品屬官御醫正八品職專診視疾病修合藥餌等事所屬惠民藥局生藥庫大使副使俱未入

流

欽天監

少昊鳳鳥氏爲歷正夏曰大使周禮春官有保章氏夏官有挈壺氏唐改司天監唐有少監宋置大使正唐有五官正靈臺郎今設監正正五品監副正六品首領主簿正八品屬官春夏中秋冬官正正六品五官靈臺郎從六品五官保章正正八品五官挈壺正從八品五官監候五官司歷俱正九品五官司晨漏刻博士俱從九品職專歷數天文地理之

上林苑監

漢武帝始起上林苑隋置宮苑總監唐置宮苑使國朝
永樂五年置左右監正正五品左右監副正六品左右
監丞正七品首領典簿正九品蕃育嘉蔬良牧林衛四
署典署正七品置丞正八品錄事正九品職專苑囿蕃
牧種植等事

五城兵馬指揮司

宋以四廂都指揮使巡警京城神宗置勾當左右廂公
事民間謂之都廂今指揮正六品副指揮正七品首領

未入流職專京城巡捕等事

京府

周成王命君陳尹東郊漢武帝更右內史爲京兆尹秦
置郡丞漢設治中一人居中治事主眾曹文唐宋太祖
諸州置通判唐節度等使皆有推官唐高祖有檢校梁
州諸軍事今南京應天府北京順天府府尹正三品府
丞正四品治中正五品通判正六品推官從六品首領
經歷從七品知事從八品照磨從九品檢校未入流司
獄從九品

所屬衙門

隋有州博士唐德宗改爲文學宋神宗於諸大郡府始置教授一人掌教導諸生今儒學教授一員從九品訓導六員未入流都稅司宣課司各門稅課司織染局草場大使俱從九品副使俱未入流各門分司副使倉遞運所金銀場鐵冶批驗所大使副使俱未入流

京縣

南京上元江甯二縣北京大興宛平二縣知縣正六品縣丞正七品主簿正八品典史未入流

公侯伯

唐虞輯五瑞爵有公侯伯子男隋文帝始封功臣爲國公唐代宗以射主軍清難始賜名寶應功臣國初功臣爵有五等後革子男其封公侯伯者皆給誥券或世襲或不世襲以功高下爲等

駙馬

駙馬非正駕車者皆爲駙馬一曰附近也疾也漢武帝置駙馬都尉以假功臣戚屬晉尙公主著始加之今公主婿皆稱駙馬都尉賜誥命

五府

晉爲都督諸軍事國初置統軍大元帥府改樞密院又改爲大都督府洪武十三年始分中左右前後軍都督府設左右都督正一品都督同知從一品都督僉事正二品首領用文職經歷從五品都事正七品各府分管在京在外衛所職專軍旅之事初以公侯伯爲之後或掌府事都督僉書軍政所屬都司二十一處畱守司一處內外衛四百九十一處守禦屯田羣牧千戶所三百一十一處儀衛司三十三處宣慰司二處招討使司一

處宣撫司六處安撫司十六處長官司七十處番夷都司衛所等四百七處

禁衛

周有虎賁氏漢京師有南北軍掌理禁衛又有羽林郎武帝更秦中尉爲執金吾唐置神策神武等軍五代後唐有侍衛親軍禁軍號控鶴年多者號寬衣控鶴宋改爲天武今在京親軍不屬府者惟錦衣衛旗手旗府軍衛府左右前後四衛金吾左右前後四衛羽林左右前三衛燕山左右前三衛虎賁左衛大興左衛濟陽濟川

通州三衛共二十二衛後又設騰驤左右武驤左右四衛亦係親軍并武功中左右永清左右彭城長陵景陵獻陵裕陵茂陵衛俱不屬府

錦衣衛

唐置營幕使宋置儀鑾使國初置儀鑾司後罷司置衛統軍同諸衛而所隸又有將軍力士校尉人等職掌直駕侍衛巡捕等事其任遇漸加視諸衛獨異首領鎮撫司問理本衛刑名成化十四年始增鑄印信各爲一司經歷用文職掌本衛文移出入所屬錦衣中左右前後

五所又分鑾輿擎蓋扇手旌節旛幢班劍斧鉞戈戟弓矢馴馬十司統領校尉掌鹵簿儀仗及直駕擎人直宿等事上中左右前後中後親軍七所分管力士軍匠又馴象所領本衛軍奴養象以備朝會陳列及駕輦馱寶之用

旗手衛

國初置旗手千戶所後陞爲衛掌大駕金鼓旗纛統領隨駕力士及宿衛等事

京衛武學

皇清類編
宋神宗始就武成王廟側建武學如太學儀國朝京師
建武學儲養京衛幼官與子弟未襲職者設教授一員
從九品訓導六員未入流

南京文武衙門

南京在洪武開爲京師自永樂定都於北因名南京文
武官並置在南京與北京同但加南京二字

南京衙門牌扁

瑣綴錄曰南京文武各衙門俱有牌扁直書衙門之名
惟翰林院三字橫列而兵部獨無相傳洪武開一夕潛

有掣去之者詰旦具聞上不之省蓋以示去兵之意至
今不敢復揭

官爵志卷之三

明 嘉興徐石麒虞求輯

十三省承宣布政使司

唐有參知政事宋下宰相一等元尚書省亦置為宰相之貳行省亦有左右參政唐高祖有檢校隋改都令史為都事今左右布政使從二品左右參政從三品左右參議從四品首領經歷司經歷從六品都事從七品照磨所照磨從八品檢校正九品理問所理問從六品副理問從七品提控案牘未入流各省所屬庫雜造織染

局大使副使陝西四川茶馬司洪武初令陝西洮州河
州西甯各設茶馬司收貯官茶每三年一次差在京官
選調邊軍齎捧金牌信符往附近番夷將運去茶馬給
與邊軍騎操大使正九品副使從九品廣西裕民司雲
南滇池魚課司大使副使俱未入流

各府

秦罷侯置守漢景帝更名太守王莽改曰大尹今知府
一員正四品同知正五品通判正六品添設無定員推
官一員正七品首領經歷正八品知事正九品照磨從

九品檢校未入流所屬司獄司司獄從九品儒學教授
一員從九品訓導四員未入流陰陽學正術醫學正科
僧綱司都綱道紀司都紀俱從九品副都綱副都紀俱
未入流稅課司分司倉庫局雜造織染局大使俱從九
品副使及茶鹽批驗所茶倉魚課司金銀場局鐵冶所
大使副使俱未入流府州縣巡檢司巡檢從九品水馬
驛丞遞運所大使河泊所官閘官埧官俱未入流

各州

唐代宗敕刺史有故及闕但令上左依次知州事隋使

府判官爲諸使官屬五代始領郡事爲州府職今知州一員從五品同知從六品判官從七品添設無定員若不及三十里長有屬縣者裁減同知無屬縣者裁減同知判官首領吏目一員從九品所屬儒學學正一員訓導二員陰陽學典術醫學典科僧正司僧正道正司道正州縣倉稅課局茶課司大使副使俱未入流

各縣

周置四百里爲縣官有縣正晉謂之大夫魯衛謂之宰楚謂之令尹唐大中年裴讓權知縣事定以朝官知縣

秦置令丞後漢有郡主簿亦曰督郵隋諸縣始置堂勾稽簿籍今知縣正七品縣丞正八品主簿正九品添設無定員若不及二十里裁革縣丞主簿首領典史一員未入流所屬儒學教諭一員訓導二員陰陽學訓術醫學訓科僧會司僧會道會司道會俱未入流

十三省提刑按察司

唐置十道按察使宋轉運使兼按察使元各道置提刑按察使有副使簽書公事爲之貳又置經歷知事等員後改肅政廉訪司今按察使一員正三品副使正四品

僉事正五品添設無定員首領經歷正七品知事正八品照磨正九品檢校從九品司獄司司獄從九品

都轉運鹽使司

唐置江淮處置轉運使後置諸道鹽鐵轉運使多以重臣兼領五代置轉運司唐明皇以崔希逸爲轉運副宋京師置都鹽院太祖以許允言爲判官今兩浙兩淮福建山東長蘆河東鹽運司運使從三品同知從四品判官從六品首領經歷從七品知事從八品所屬儒學教授從九品訓導未入流批驗鹽引所鹽課司分司倉庫

大使副使俱未入流

鹽課提舉司

宋熙甯有大都大提舉茶馬事紹興復置提舉茶鹽司元置都提舉同提舉副提舉等員今廣東陝西四川雲南鹽課司提舉從五品同提舉從六品副提舉從七品首領吏目從九品

苑馬寺

今卿從三品少卿正四品寺丞正六品首領主簿從七品所屬各監監正正七品監副正八品錄事未入流苑

圍長從九品

衍聖公

宣聖襲封衍聖公孔氏子孫正二品司樂管勾典籍俱未入流孔顏孟三氏教授從九品學錄未入流

王府長史司

秦置郡丞以佐守在邊爲長史掌兵馬今王府長史正五品首領典簿正九品所屬審理所審理正正六品審理副正七品紀善所紀善正八品典寶所典寶正正八品典寶副從八品典膳所後漢有太子食官隋改爲典

膳正今王府因之典膳正正八品典膳副從八品奉祀所奉祀正正八品奉祀副從八品典樂正九品良醫所良醫正正八品良醫副從八品工正所工正正八品工副從八品典儀所元有太子典儀今王府因之典儀正正九品典儀副伴讀教授俱從九品引禮舍人倉庫大使副使俱未入流

郡王府典膳正八品教授從九品

中都畱守司

唐明皇太原置尹以爲畱守謂之三都畱守蓋車駕不

在京則置留守今留守正二品副留守正三品首領經歷司經歷正六品都事正七品

各都指揮使司

唐兵志曰僖宗幸蜀以神策大將軍爲都指揮使今都指揮使正二品都指揮同知從二品都指揮僉事正三品首領經歷司經歷正六品都事正七品司獄司司獄從九品斷事司斷事正六品副斷事正七品吏目未入流庫大使從九品副使草場大使倉副使俱未入流

各衛

漢武初置衛將軍今一衛隸軍五千六百名指揮使止三品指揮同知從三品指揮僉事正四品衛鎮撫從六品首領經歷司經歷從七品知事正九品所屬千戶所隸軍一千一百二十名正千戶正五品副千戶從五品百戶所隸軍一百一十名百戶正六品每所設總旗二名小旗十名已上武官俱世襲惟首領屬官選除

衛學

國朝軍衛無學宣德十年從兵部尙書徐河之請令天下軍衛獨治一城者皆立學正統以來天下軍衛延至

邊繳建學設教授訓導品秩俸祿如府學之制

鎮戍

唐制緣邊戎寇之地則加以旌節謂之節度使武德初邊要之地亦置總管以統軍國朝凡天下要害處所專設官統兵鎮戍總鎮一方者曰鎮守獨守一路者曰分守獨守一城一堡者曰守備有與主將同處一城者曰協守又有備倭提督提調巡視等官其官稱掛印專制者曰總兵次曰副總兵曰參將曰遊擊將軍俱於公侯伯都督都指揮等官內推舉充任

土官宣慰使司

唐以藩方不靖遣重臣宣諭慰安之故有宣慰使之名今宣慰使從三品同知正四品副使從四品僉事正五品首領經歷司經歷從七品都事正八品儒學教授從九品訓導未入流宣撫司學同

宣撫使司

唐有宣撫使宋不常置有軍旅大事則命執政大臣為之今宣撫從四品同知從五品副使從五品僉事正六品首領經歷司經歷從八品知事正九品

招討使司

唐有招討使用兵權置後以節度使兼之元有招討使副招討今招討從五品招討副正六品首領吏目從九品經歷從七品

安撫司

隋有安撫大使唐以節度使兼之德宗置副使今安撫從五品同知正六品副使從六品僉事正七品首領吏目從九品

長官司

長官正六品副長官從六品吏目教諭訓導俱未入流

蠻夷長官司

長官正七品副長官從七品已上土官俱世襲惟首領屬官選除

吏員

文獻通考曰西漢開儒吏二途以取人未為抑揚輕重自後判為二途儒詆吏為俗吏謂儒為迂故拘固不通者一歸之儒放蕩無恥者一歸之吏而二途皆不足以得人矣

六房

唐張說爲相改政事堂號中書門下列五房於後一曰吏房二曰樞機三曰兵房四曰戶房五曰刑禮旁分以曹官主眾務焉國朝各衙門立吏戶禮兵刑工六房吏典書辦文移

吏員出身品級

通典曰令史漢官也晉中書有主書之員齊爲主書令史後魏於尙書諸司置主事令史又尙書都令史宋太祖知堂吏擅中書事權多爲奸贓故選授用正人神宗

行官制除堂後官之名於門下省中書省置錄事而已國朝一品二品衙門提控都吏通吏出身從七品一品二品衙門掾吏令史典吏出身正八品內府門吏出身正八品三品衙門令史胥吏書吏出身從八品三品衙門典吏四品衙門令史出身正九品四品衙門典吏五品衙門司吏典吏巡按書吏各道書吏出身從九品六品七品八品九品并雜職衙門吏典都察院各道典吏俱出身雜職

歷代銓選志

唐虞三代

清吏部文選司郎中

袁定遠訂編

書曰天工人其代之又曰爾安百姓何擇非人此選賢任能所以致太平而發頌聲者也唐虞之世四岳九官十二牧二十有二人咸服在列中外有統天工寅亮未聞其更禹而明刑易皋陶而治水遷稷而典禮易夔而敷教蓋各名一官各辨一體以盡其才而世守其業故上不致枉其才而下亦不致負其職用之者惟知明目

達聰以共安天下之民視才之稱否而不以位之崇卑
爲輕重效用者亦惟知同心一德以共安天下之民究
績之成否而不以事之勞逸爲美惡若皋陶知人官人
之謨則又盡性術之變以收俊乂之用而三德六德所
由宣嚴於邦家翕受敷施所由贊襄於有位豈非任官
之極軌哉嗣是自夏而商迄于成周莫不迪知忱恂于
九德之行而禹以之籲俊則宅乃事宅乃準而官與人
相得君道從此而昭明湯以丕釐則用三有宅克卽宅
稱三有俊克卽俊而實與名相符功德從此而懋著文

以之敬事則克知三有宅心灼見三有俊心而罔有兼
于庶獄庶慎惟有司之牧夫是訓用違所由克宅厥心
以克立茲常事司牧人而克俊有德武王承之則建官
惟賢位事惟能厥義德不敢替厥容德率謀從而所以
立政惟任人準夫牧作三事於是近而侍御內而都邑
外而候甸遠而夷微盧烝皆得其人周道所以日隆也
迨周公相成王董正治官立六典建三百六十屬悉統
於太宰而以馭羣臣則有八柄一曰爵以馭其貴二曰
祿以馭其富三曰予以馭其幸四曰置以馭其行五曰

生以馭其福六曰奪以馭其貧七曰廢以馭其罪八曰
誅以馭其過以作勸勉則有六敘一曰以敘正其位二
曰以敘進其治三曰以敘作其事四曰以敘制其食五
曰以敘受其會六曰以敘聽其治當其時敷於司徒士
造于樂正官辨于司馬版掌于司士其始也掄材度德
不遽進也司馬論進士之賢者告于王而定其論論定
然後官之任官然後爵之位定然後祿之而官方無僥
倖之徑其卽也謹方馭柄不苟蓉也司士歲登下其損
益其數辨其年歲與其貴賤周知邦國都家縣鄙之數

卿大夫士庶子之數以詔王治而以德詔爵以功詔祿
以能詔事以久奠食凡邦國三歲則稽士任而進退其
爵而朝廷鮮冒濫之失士亦不得懷餘力于心進亦不
負兼官之責于君眾正效能而萬幾理羣賢豫附而泰
階平胥是道也周衰用人不令而政亂小人援親黨以
相左右于是節彼霜之刺興北山雨無正之詩作任官
之制紊而周道蕩然矣及齊桓公圖霸任管仲爲相仲
立五鄉之長五屬之大夫使各退而修德進賢正月之
朝公親命之鄉屬之賢公親見之凡役于官者令官長

期而書代以告晉文公始莅政屬百官賦職任功舉善
援能官方定物正名育數昭舊族明賢良尊貴寵賞功
勞于是胥藉狐箕欒卻之屬實掌近官諸姬之良掌其
中官異姓之能掌其遠官政平民阜焉獨至秦用商鞅
爲政務於富强舉仕進之途唯闢田與勝敵爲法斬一
首者爵一級欲爲官者爲五十石之官斬二首爵二級
欲爲官者爲百石之官官爵之遷與斬首之功相稱宗
室非有軍功論不得爲屬籍明尊卑爵秩等級各以差
次有功者顯榮無功者雖富無所紛華然究使其俗急

首功而棄禮義干賞蹈利冒上凌等其弊可勝救哉

兩漢

漢興定制凡郡國之官非傳相其自別駕長史而下皆
刺史守相得辟除署用又調僚屬及部民之賢者舉爲
秀才廉吏而貢于王廷多拜爲郎居三署無常員或至
千人屬光祿勳故卿校牧守居閒待詔或郡國貢送公
車徵起悉在焉光祿勳復于三署中銓第郎吏歲舉秀
才廉吏出爲他官以補缺員至于郡縣首相高第者則
擢二千石二千石有治行者則擢九卿九卿稱職者則

擢爲御史大夫初高惠之時疏節闊目視成周忱恂之制已遠然貴廉潔賤貪污賈人贅婿及吏坐賦者俱不得推擇爲吏而宏易簡恕下賢之至意怛然故漢官爲多循武帝卽位董仲舒對言今之郡守縣令民之師帥所使承流而宣化也故帥帥不賢則主德不宣恩澤不流今吏旣亡教訓之功或不承用主上之法暴虐百姓與奸爲市貧窮孤弱冤苦失職甚不稱陛下之意且古所謂功者以任官稱職爲差而非積日累久之謂也是以有司竭力窮志務盡其業以赴功今則不然累日以

取貴積久以致官是以廉恥貿亂賢不肖混淆未得其真臣愚以爲無以日月爲功實試賢能爲上量材而授官錄德而定位則廉恥殊路賢不肖異處矣于是延文學儒生待詔數百人或召見進用或補博士弟子而羣士嚮慕異人竝出卜式拔于芻牧宏羊擢于賈豎衛青奮于奴僕日磬出于降敵斯亦曩時版築飯牛之儔也漢之得人于茲爲盛儒雅則公孫宏董仲舒倪寬篤行則石建石慶質直則汲黯卜式推賢則韓安國鄭當時定令則趙禹張湯文章則司馬遷相如滑稽則東方朔

學海類編
枚皋應對則嚴助朱買臣歷數則唐都洛下閎協律則
李延年運筭則桑宏羊奉使則張騫蘇武將率則衛青
霍去病受遺則霍光金日磾其餘不可勝記是以興造
功業制度遺文後世莫及也歟然帝誅罰深必士罕能
自全又其時外事征伐內闕用度入物者補貽出貨者
除罪選舉陵遲廉恥相冒已府庫益虛乃募民能入奴
婢得以終身復爲郎增秩其後賦稅旣竭猶不足供戰
士乃置買武功爵吏道雜而多端雖招尊賢良文學方
正之士或至公卿大夫然法令慘急俗驚功利云至宣

帝勵精圖治綜覈名實常曰庶民所以安其田里而無
嘆息愁恨之心者政正訟理也與民共此者其唯良二
千石乎每拜刺史首相必親見咨問又以太守吏民之
本數變易則下不安民知其將久不可欺罔乃服從其
教故二千石有治效不輒遷以璽書勉勵增秩賜金或
爵至關內侯公卿缺則選諸所表以次用之而侍中尙
書以功勞遷及有異善者厚加賞賜官得其才位必久
安漢世良吏盛于此時職是故也元帝永光元年詔丞
相御史舉質朴敦厚遜讓有行者光祿歲以此科第郎

從官成帝建始二年始制常侍曹尚書一人主公卿又有二千石曹尚書一人掌郡國二千石蓋選曹之所起也哀帝嗣統欲匡成帝之政多所變動丞相王嘉上疏以爲聖王之功在於得人因薦儒者公孫光滿昌及能吏蕭咸薛修等皆故二千石有名稱天子納而用之大抵漢時未立資格而資格甚嚴若郡縣守相之高第者然後爲二千石二千石之有治行者然後爲九卿九卿之稱職者然後爲御史大夫至于丞相則非御史大夫之任職者不遷此其大者之有常格也博士高第者爲

尚書次者爲御史否則以次補諸太學博士弟子至二歲通一藝以上補文學掌故其高第爲郎中文學掌故郡屬備員此其小者之有常格也諸官初除必先試守試守一歲然後爲真則稱號有常格矣有市籍者不得爲官入材爲官者不得名職則流品有常格矣然其閒遷轉唯上所命初不以品秩高下爲升降士亦俯首聽命而莫敢有所請如張釋之十年不得調揚雄三世不徙官至有爲太僕立功自高至文而猶未離乎舊職則何具淹滯若此也若賈誼超遷歲中至大中大夫公孫

學海類編
宏徒步數年至宰相封侯王仲翁大將軍長史三歲至
光祿大夫又何其遷之甚速也彼其黜陟進退雖未必
皆當乎賢否而其用舍一出于上固未始有資格之拘
也用人惟視才績而等級次第亦自有品節存乎其間
其以明經文學進者多除博士或大夫侍中如嚴助朱
買臣疏廣平當之徒是也其以勇猛材武進者多除太
僕或中郎將驂乘如夏侯英公孫賀衛綰之徒是也張
湯以律法進退則先以法官處之始爲內史後爲廷尉
皆法官也黃霸以入粟補官則先以財賦處之始爲卒

吏後爲均輸皆掌財也雖其始有分別而積功累勲無
不可任固未始有流品之格也第至于大臣不職去之
可也收其印綬可也亦何至左遷他官以奪之孔光免
丞相爲博山侯久之復爲光祿大夫位次丞相月餘爲
御史大夫未幾復爲丞相以至韓安國蕭望之翟方進
之徒皆以御史大夫爲他官彼常執天子之政矣常正
百官而統其權矣今一旦降尊就卑使之與僚佐比肩
而治事豈所以待大臣哉武帝始用儒者爲宰相革去
軍功刀筆之選誠一代之良法矣而其後亦唯意所用

不專用儒生汲黯謂刀筆吏不可爲公卿蓋有激而云然終漢之世清濁混淆上下無別以宦官典領尙書以儒術直祕閣尙書郎掌代王言而以令史久次補之宜乎丁邯恥以孝廉而爲郎也使其陞遷上至公卿而有隄法則雖流品不分何害哉後漢光武改常侍曹尙書爲吏曹尙書其時選舉于郡國屬功曹于公府屬東西曹于天臺屬吏曹亦曰選部而尙書令總之尙書之重始此其所進用以歲月先後爲之次時帝以二千石長史多不勝任有織過卽見斥逐交易紛擾百姓不甯朱

浮疏言物暴長者必天折功卒成者必亟壞如摧長久之業而造速成之功非國家之福也天下非一時之用海內非一旦之功顧游意于經年之外望化于一世之後天下幸甚帝下其議羣臣多同于浮自是牧守代易頗簡焉十二年詔舊制光祿勳舉三署郎以高功久次才德尤異者爲茂才四行明帝永光元年命司隸校尉部刺史歲上墨綬長吏視事三歲以上理狀尤異者各一人與計偕上至章帝時貢舉率非次尙閎闕而所徵舉皆特拜不復簡試故守職者益懈而吏事浸疏韋彪

諫以爲天下樞要在於尚書而閒者多從郎官超升此位雖曉習文法長於應對然察察小慧類無大能宜簡州宰賢名者專心向公奉職周密尋至順帝陽嘉初宦倖用事引援子弟吏事日非李固曰夫化以職成官由能理古之進者有德有命令進者惟利與力伏聞詔書務求廣博疾惡嚴暴而今長吏多殺伐致聲者必荷遷賞其存寬和無黨援者輒見斥逐是以淳厚之風不宣刁薄之俗未革宜審擇其人以毗聖政招廣羣儒罷退宦官則升平可致帝覽其對多所納用朝廷爲之肅然

久之尚書令左雄議改察舉之制於是選舉清平多得其人乃一時英能承風俊乂咸事若李固周舉之淵謨宏深黃瓊胡廣之政職練達桓焉揚厚以儒學進崔瓊馬融以文章顯吳祐蘇章种暲樂巴牧民之良幹龐參虞詡將師之宏規王龔張皓虛心以推士張綱杜喬直道以糾違郎顓陰陽詳密張衡機術特妙東京之士于茲盛焉及孝溫之時豎宦充朝重封累職傾動朝廷卿校牧守之選多出其門任人及子弟爲官布滿天下競爲貪淫朝野嗟怨于是大尉楊秉條奏牧守以下五千

學海類編
餘或死或免天下振肅焉久之帝倖南陽左右通奸利
多特敕除拜又占賣官錢各有差靈帝光和元年初開
西邸自關中侯虎賁羽林皆入錢是時段閭樊陵張溫
等雖有功勤名譽然皆先輸貨財而後登公位崔列因
傅母入錢五百萬得爲司徒帝欲以揚績爲太尉時拜
三公者皆輸東園禮錢千萬中使督之績乃坐使人于
單席舉縕袍示之曰臣之所資唯此而已劉陶爲京兆
尹列職當出修宮錢直千萬陶旣清貧而恥以錢買職
稱疾不聽政帝重陶之才特原其罪嗟乎銓衡不平則

輕重錯繆斗斛不平則多少混亂繩墨不陳則曲直不
分乃望其風向草偃庶事之康何異懸瓦礫而責夜光
絃不調而索清音哉

魏晉

魏初毛玠與崔炎竝典選舉用皆清正之士由是天下
士莫不以節廉自勵時有長吏還者垢面羸衣常乘柴
車魏武嘆曰孤之法不如毛尙書使吏部人人如玠風
俗之易何難和洽言于公曰天下大器在位與人不可
以一節儉也儉素過中自以處身則可以此格物所失

或多今朝廷之議吏有著新衣乘好車者卽不謂之廉潔至令士大夫故汙辱其衣藏其輿服朝府大吏或自挈壺飧以入官寺夫立教觀俗貴處中庸爲可繼也乃從一概難堪之行以御殊途勉而爲之必至疲瘁古之大教在通人情而已凡激詭之行則容僞矣乃令禁之勢稍衰止魏文帝時吏部尙書陳羣以選用不盡人材乃立九品官人之法其武官之選則俾護軍主之自明帝太和之後俗用浮靡遞相標目有四聰八達之稱司徒董昭言古之有天下者莫不貴朴忠之士疾虛僞之

人謂浮言華貌敗俗傷化也今年少不以學問爲本而專交游爲業國事不以孝弟清修爲首而以趨勢游利爲先至乃往來禁奧交通探問此法之所不取刑之所不赦也帝曰善詔郎吏通一經以上任牧民者亟登用其浮華不務實者罷之會詔以侍中盧毓爲尙書吏部尋詔曰選舉無取有名名如畫地作餅不可啖也毓對曰名不足致異人可以得常士常士慕善畏教方乃有時名名非所常疾也臣愚旣不足得異人但當循名按實徐有以驗其後耳毓選舉先性行而後才言或問之

曰才所以爲善也故大才成大善小才成小善今稱有才而不爲善是才不中器與不才同故所舉皆一時名德焉晉興依魏九品之制內官則有吏部尙書司徒左長史外官則州有大中正郡國有小中正皆掌選舉凡吏部選用必下中正徵其行實世籍乃行其後中正任久愛憎由己而九品之制漸壞遂計官資以定品格天下惟以居位者爲貴無復銓衡之實尙書劉毅以爲今立中正定九品不精才實務依黨利不均稱尺務隨愛憎所欲與者獲虛以成譽所欲下者吹毛以求疵或以

貨賂自通或以計協登進是以上品無寒門下品無勢族慢主罔時實爲亂源宜罷中正除九品棄魏氏之弊法立一代之美制司空衛瓘亦表請除九品復古鄉議里選使舉善進才各由鄉論人知善否之教不在交游則華競自息各求于己又宜準古制使朝臣共相舉任帝雖善之而皆不能用是時山濤爲吏部尙書每官缺輒擬數人隨帝意所欲然後明奏而所用者或非舉首眾情不察以濤任意輕重或出譖言而濤行自若一年之後眾情始服嗣是任選十有餘年其所甄拔各爲題

學海類編
三
目時稱山公啓事濤罷王戎爲吏部戎始爲甲午年制
凡選舉皆先理百姓然後拔用然未嘗進寒素退虛名
但與世浮沈戶調門選而已及劉頌爲吏部復建九班
之制令百官在職不遽遷時仕者務速進故尼不行至
惠帝之後權在羣下政出多門勢位之家更相薦援有
如互市每朝會貂蟬盈坐時人爲之諺曰貂不足狗尾
續名器之濫一至於此及三王起義又制己亥格其後
論功雖小亦皆依用元帝時陳頴典法兵二曹與王導
書曰中華所以傾弊四海所以土崩者正以取才失所

先白望而後實事浮競驅馳互相貢薦言重者先顯言
輕者後者遂相波扇乃至凌遲今宜張明賞罰拔卓茂
于密縣顯朱邑于桐鄉然後大業可舉盛治可期耳然
俗弊已久終不能革簡文帝時眾言漸多而遷徙每速
王彪之曰得賢之道在于莅任莅任之道在于能久天
下凡庸之族眾賢能之才寡才寡于世而官多于朝得
不賢鄙共進清濁同官官眾則闕多闕多則選速前後
去來更相代補所以職事未修朝風未澄也職事之修
在于省官朝風之澄在于并職官省則選清而得久職

并則吏簡而俗靜選清則勝人久于其事事久則中才
猶足有成今內外百官較而計之固應有并省者也凡
餘諸官無綜事實者可令大官隨才而領之或因缺而
省之委之以職分責之以有成能否因考績而著清濁
因黜陟而彰庶官之選差清莅職之日差久無奉祿之
虛費簡吏寺之煩役矣然士風趨競禮教陵遲大人溺
于成俗執政撓于羣言衡石爲之失平清濁安可復分
哉

唐

唐制選有文武文選吏部主之武選兵部主之皆爲三
銓尚書侍郎分主之每歲五月頒格于州縣以十月會
于省其以時至者乃考其功過同流者五五爲聯京官
五人保之如刑家之子工賈異類及假名承僞隱冒升
降者有罰文書粟錯隱倖者馭放之凡擇人之法有四
一曰身體貌豐偉二曰言言辭辨正三曰書楷法適美
四曰判文理優長四事皆可取則先德行德均以才才
均以勞得者爲畱不得者爲放五品以上不試上其名
中書門下六品以下始集而試觀其書判已試而銓察

其身言已銓而注詢其便利而擬已注而唱不厭者得
反通其辭三唱而不厭聽冬集厭者爲甲上于僕射乃
上門下省給事中讀之黃門侍郎省之侍中審之然後
以聞主者受旨而奉行焉謂之奏受視品及流外則判
補皆給以符謂之告身凡官已受成皆廷謝凡試判登
科計之入等甚拙者謂之藍縷未選滿而試文三篇謂
之宏詞試判三條謂之拔萃中者卽受官貞觀二年侍
郎劉林甫言隨制以十一月爲選始至春乃畢今選者
眾請四時註擬從之十九年馬周以四時選爲勞乃復

以十一月選至三月畢高宗總章二年少長伯裴行儉
始設長名榜引銓注法復定州縣升降爲八等其後員
外郎張仁禕又造樣銓歷等程式而銓總之法密矣然
是時入仕者眾庸愚咸集有僞主符告而矯爲官者有
接承他名而參調者有遠人無親而置保者試之日冒
名假手多非其實至武后時天官侍郎魏元同請復古
辟舉之法不報長安二年舉人授拾遺補闕御史著作
佐郎大理評事衛佐凡百餘人明年引見風俗使舉人
悉授試官高者至鳳閣舍人給事中試官之起自此始

中宗時韋后及太平安樂公主用事于側門降墨敕斜封授官號凡數千員內外盈溢無廳事以居當時謂之三無坐處言宰相御史及員外郎也韋氏敗始以宋璟爲吏部尚書姚元之爲兵部尚書悉奏罷斜封官量闕畱人雖貧高考深非才實者不取初尚書銓掌七品以上選侍郎銓掌分品以下選至是通其品而掌焉未幾璟凡之等罷又盡復斜封別勅官元宗卽位勵精爲治詔擇京官有善政者補刺史而悉集新除縣令宣政殿觀臨問以治人之策而擢其高第者又詔員外郎御史

諸供奉官皆進名勅授而兵吏部各以員外一人判南曹由是銓司之任輕矣其後戶部侍郎于文融又建議置十銓乃以蘇頲等分主之吳兢諫曰易稱君子之思不出其位言侵官也奈何以萬乘之君下行選事帝悟遂復以三銓還有司開元十八年侍中裴光庭兼吏部尚書始作循資格賢愚一槩必與格合乃得銓授于是淹滯不收者皆便之及光庭卒中書令蕭嵩以爲非求才之方奏罷之又銓選故事必三銓三注三唱而後擬官季春始畢乃過門下省揚國忠建議選人視官資書

判狀迹功優宜對眾定流放乃先遣吏密定員闕一日會左相及諸司長官于都堂注唱以誇神速由是門下過官三銓注官之制皆廢肅代以後兵興天下多故銓法益濫德宗時試太常寺沈既濟極言其弊曰近世爵祿其失之者四太而已入仕之門太多世胄之家太優祿利之資太厚督責之令太薄臣以爲當輕其祿利重其督責請令五品以上及羣司長官宰臣進敘兵吏二部得參議焉六品以下或僚佐之屬聽州府辟用則銓擇之任委于四方結奏之成歸于二部必先擇牧守然

後授其權高者先署而後聞卑者聽版而不命其牧守將帥或選用非公則吏部兵部得察而舉之聖主明目達聰逃聽遐視罪其私冒不任舉者小加譴黜大正刑典責成授任誰敢不勉夫如是則賢者不獎而自進不肖者不抑而自退矣天子雖嘉其言然重于改作不能用初吏部歲常集人其後數歲一集選人猥至文簿紛襍因得以爲奸利士或十年不得官而闕員亦累歲不補陸贄爲相乃懲其弊命吏部據內外員三分之計闕集人歲以爲常是時士人大率二年居官十年待選而

考限遷除之法浸壞憲宗時宰相李吉甫復定考選之格著爲令甲焉按唐之銓選其制不一凡流外兵部禮部舉人郎官得自主之謂之小選太宗時以歲旱穀貴東人選者集于洛州謂之東選高宗上元二年以嶺南五管黔中都督府得卽任土人而官或非其才乃遣郎官御史爲選補謂之南選其後江南淮南福建大抵因歲水旱皆遣選補使卽選其人而廢置不常選法又不著故不復詳焉

宋

宋設官分職其入仕有貢舉奏廕攝署流外從軍凡五等而其選人自京府畱守節度觀察判官下至今錄簿尉凡七等吏部銓惟注擬州縣官幕職兩京諸司六品以下官皆無選文臣少卿監以上中書主之京朝官則審官院主之武臣刺史副率以上內職樞密院主之使臣三班院主之其後分典選之職爲四文選曰審官東院曰流內銓武選曰審官西院曰三班院元豐定制而後銓注之法悉歸吏部于吏部有四選之法以審官東院爲尙書左選文臣之升朝者歸焉流內銓爲侍郎左

選初仕幕職州縣官歸焉以審官西院爲尙書右選武
官之升朝者歸焉初太祖始削外權命文臣往莅藩郡
然內外所授官多非本職唯以差遣爲資歷建隆四年
詔選朝士分治劇邑其重其事常參官宰縣自此始先
是選格未備乾德二年命陶穀考正選法之違複者而
補其缺漏定其經式自是銓法漸有倫矣帝又慮銓曹
惟用資歷而才傑或沈滯詔吏部取赴選人歷任課績
多而無缺失者進中書引驗拔擢之令選人應格者到
卽赴集不必限四時又令諸道節度觀察使于部內官

選才識優茂德行敦篤者各二人防禦團練使各舉一
人遣詣闕庭觀其器業而進用焉凡被舉擢官于誥命
署舉主姓名他日不如舉狀則連坐之太宗時選注者
往往得引對親擢又時或臨軒注選謂宰相曰朕欲擇
一河北轉運使日閱班部多不詳操履朕何自息知今
後臣僚授任竝詳具履歷狀乃引對庶得考觀其行能
時帝尤嚴牧守之任詔諸道使者察部內履行著聞政
術尤異文學茂異者州長史擇判司簿尉之清廉明幹
者具名以聞驛召引對授之知縣聽政之暇每取兩省

兩制清望官名籍擇其有德行者悉令舉官所舉之人
須析其爵里及歷任殿最以聞不得有隱咸平閒祕司
丞陳彭年請用唐故事舉官自代馮拯等請令臺省六
品以上諸司上表讓一人以自代其表付中書門下每
官缺以見舉多者量授之遂著爲令至眞宗時選人須
三任六考有奏薦功賞乃得遷無功薦有至四十年不
遷者仁宗卽位曰此豈人情之所樂耶其亟代之于是
銓注引見率常至叶食時中書可否多用例入學士劉
沆進言曰近臣保薦辟請動逾數十皆浮薄權豪之流

交相薦舉有司以之貿易遂使授官公選多出私門又
職掌吏人遷補有常而或減選出官超資換職堂除便
蒙先次差遣之類此近臣保薦之弊一也審官吏部銓
三班當入川廣乃求近地當近地又求在京及堂除升
陟省府館職檢討之類此近臣陳句親屬之弊二也其
敘錢穀管庫之勞捕盜招安之賞常格雖存僥倖猶甚
以法則輕以例則厚執政者不能持法多以例與之此
敘勞干進之弊三也顧詔三事毋用例事行眾頗不悅
而諫官孫洙亦言資格之弊傷治爲甚因是舉官擢人

學海類編
卷之三
悉詔近臣舉廉幹吏選任毋拘資格至文行之士錢穀
之才刑名之學各因時所求而薦焉天聖後進者頗多
物議始戒近臣非受詔毋輒舉官又下詔風厲毋薦舉
爲阿私慶歷中宋興六十有餘年矣天下承平久磨勘
法用而銓壅大臣任子彌濫天子優游寬容賢不肖並
進范仲淹參大政上言今者文資武職不限內外不問
勞逸輒磨勘敘遷雖甚猥鄙而卿監丞郎固可坐而至
也此豈黜幽陟明意哉而亦諸司因循不自奮之由也
請自今二府臣僚有大功善加爵命爲特恩自餘不許

非時進秩其京朝官有高才異能奇略嘉謨爲上著信
及外任以善政聞者自以特恩改擢自餘須在職三年
始與磨勘其武臣磨勘年委樞密院比文資定奪以聞
又曰古公卿以德任官士世祿不世官春秋譏世卿重
官材也祖宗朝任子法臺省六品諸司五品以上登朝
歷兩任乃聽則猶有限度也自祥符中天子以世隆平
嘉興臣下同其大慶許大臣任子歲一人遂沿不改經
二十年則一家兄弟子孫京官多至二十人蓋濫極矣
請自今兩府選國大慶許任一子餘不得陳乞又曰今

皇清類編
三
刺史縣令古之諸侯百姓之舒慘休戚繫焉故歷代盛時靡不重之今獨累資考以授懦弱者多縱吏以蠹民強幹者每近名而賊物則國本殘矣時論是之英宗時御史中丞賈黯言皇祐中始限監司奏舉之數其法益密而磨勘待次者已不減六七十人皇祐及今纔十年耳而猥多至于三倍向也法疏而其數省今也法密而其數增此何故哉薦吏者歲限定員務充數而已如郡守歲許薦五人而歲終不滿其數則人人以爲遺己當舉者避謗畏譏欲止不敢此所以舉多而真才實廉未

免混于無能也宜明詔天下使有人則薦不必滿所限之數天子納其言下詔舉京官者視原數率三分減一神宗卽位欲更制度始刊削舊例務從簡便因廢南曹而歸併之銓悉罷內外長吏舉官法明年令吏部定選格其法各隨所任職事以人任功狀循格以俟擬注元祐初左司諫王巖叟言自罷辟舉而通選格可以見功過而不可以見人才中外病之于是遂復內外舉官法及司馬光爲相奏設十科取士一曰行義純固可以師表科二曰節操方正可備獻納科三曰智勇過人可備

學海類編
將帥科四曰公正聰明可備監司科五曰經術精通可
備講讀科六曰學問該博可備顧問科七曰文章典麗
可備著術科八曰善聽獄訟盡公得實科九曰善治財
賦公私俱便科十曰練習法令能斷請讞科每歲須于
十科內舉三人仍具保狀任中書置簿記之異時有事
須才卽執籍按科隨試官闕則取常試有效者授職若
任官無狀坐繆舉者紹聖初改定銓試格崇甯以後又
復元豐制迄重和之際賄賂公行隨其厚薄爲注闕之
高下而取償于莅官之後有剛正無賄者則定差之牘

脫漏言詞隱落節目待其參會已半年所矣是以闕多
而不調者眾銓法大壞高宗紹興元年起居郎胡寅言
典章文物廢墜無幾百司庶官不可缺者莫如吏部姑
置侍郎一員郎中二員胥吏二十人則所謂磨勘封敘
奏薦常程之事可按而舉矣詔令三省議除其弊嚴立
賞禁仍遷能吏以主之御史加糾察焉于是三省定立
八事曰注擬藏闕申請徼倖去失艱難刷闕減裂關會
淹延審量疑似給付邀求保明退難令長貳樞柅之一
尊故事分歸部銓又復文臣銓試以經義詩賦時務斷

案律義爲五場願試一場者聽自渡江後文籍散佚會
廣東轉運司以所錄元豐元祐吏法來上乃詔僕射朱
勝非詳加考定書成爲吏部七司敕令格式焉然自建
炎以來兵興多事須才日急特廣開薦舉名目不一而
足或以朝班多闕詔郎官以上薦士二人或以中原士
夫流徙東南媒寡援疏多致沈滯令侍從搜訪以聞或
以人才聚于兩浙屬吏薦員甚狹增部使者薦舉改官
之額考宗時命內外選在任閒居待次官舉可任監司
郡守之人以資序分二等一見今可任一將來可任注

籍于三省以憑除擢又令會歷軍功觀察使以上各舉
一人其通習典章可掌朝儀練達民事可任郡寄閭曉
財計可裕民力持身廉潔可律貪鄙詞辯不屈可備奉
使凡五等隆興三年禮部尙書趙雄請令侍從臺諫兩
省于知縣次序以上歲薦堪充郡守通判次序以上歲
薦監司仍用漢朝雜舉之制三省詳加考察詔如所請
帝曰薦舉本欲得人又恐干請反長奔競龔茂言三代
良法亦不免于弊今欲精選監司郡守非薦舉何由知
之帝曰若今雜舉則雖眾論僉允又經中書考察而後

除授亦博采遴選之道也孝宗以歲舉京官數濫于是內外薦舉改官俱減員數通籍之數省矣至甯宗時詔毋得減年參選著爲令又令內外薦舉並其實迹以聞自是濫舉之弊稍革理宗紹定元年臣僚上言銓曹之患員多闕少注擬甚難自乾道嘉定以來常令選部職官窠闕各于元出闕年限以上與展半年用闕歷年寢久入仕者多卽今吏參注之籍文臣選人不下萬人七千餘員大率三四人共注一闕宜其膠滯壅積而不可行乞命吏部于元展限之上更展半年從之總而論之

宋初官人之法文臣屬中書武臣屬樞密太宗分中書之權而置審官院神宗分樞密之權而置審官西院遂以文臣之審官爲東焉于後合東西審官之權而歸之左右尚書文臣之差注吏部若得專其責矣然監司郡守及御史省郎以上皆中書主之正將副將準備將以上皆樞密主之此堂除所以重本也祖宗以來資格甚嚴其用某人也必曰常歷某資也由守而憲由憲而漕由漕而三路使而三司副使方除待制自熙甯大臣超用新進有邑宰資序而爲監司郡守者有選人未改官

而亦預俊拔者官制既行資序止于吏部朝廷所除由
于臨時而資格壞矣夫待常才以資待非常之才以望
如徒以資而已則盛德善行瑰奇偉雋之士或拘格而
遲回然專捨資用望則狂謬之流矯抗之士或以虛名
進矣其用望之弊當有甚于資也然資格終可廢也昔
范文正公爲百官圖以進指其遷進遲速次序曰如此
則爲敘遷如此則爲不次意必有范公而後可以用資
寇忠愍欲擢指揮使吏以例籍進白公曰若用例一吏
職耳安用我輩意必有寇公而後可以用望否則資望

俱失矣

明

明興立制文武竝用文選主于吏部武選主于兵部文
臣入仕之途非一端其大要有三進士也監生也吏員
也員資格止于七品用之爲佐貳幕職監當管庫之職
非有保薦者不得爲州縣正員監生則出自學校之員
選及舉人之隸業太學者循次以出先歷事于府部諸
司然後次其名于選曹仍資考其高下而授以職進士
初亦循其甲第以爲出身之差及其功績顯著則不資

擢用往往拓越常調凡選歲引選六類選亦如之遠方選二朝覲之歲揀選一歲選教職無常期選庶吉士會翰林院禮部試之此其大槩也洪武初凡孝廉人才及郡縣學所貢士若富戶耆民皆得見見稱旨卽擢不次而國子生奉命巡列郡廉官方吏治問察民間病苦還稱旨卽擢用爲行省參政僉事知府等官至有擢僉都御史者已患雜流爲民害也命國子監擇貢生通經術者十人送銓部選州縣知官時上欲資格用人謂吏部曰朝廷懸爵祿以待天下之士資格者爲常流設耳若

有賢才豈拘常格今後庶官有才能居下位者當不次用之由是李煥文自西安知府費震自寶鈔題舉俱擢爲戶侍郎其餘九十五人悉量才超擢郎中知府知州等官蓋一主于用人諸所定貢舉銓選考課法雖參前代之制而詳擇之然不專倚也成祖卽位申敕吏部曰內外諸司于羣臣百姓中堪重任而沈滯下僚堪劇煩而優游散地抱德懷才而隱田野者各以名聞時蹇義上言在外官職唯承流宣化以撫字爲職必須得人然得入之道在銓選精嚴薦舉法宜令在京文職七品以

學海類編 卷之三
事功
上近侍及外任五品以上至縣正官各舉所知吏部考
驗擢用其所稱非職或授職之後闕其貪污則連坐舉
主帝是其言命所司施行焉昭帝卽位首申重舉官之
令命吏兵二部悉具各省司官姓名履歷揭西序得親
品驚之久之以武臣疏于事理而專軍法命選任方面
參政副使等官于各邊參贊軍務治章奏督糧儲文臣
協提督自此始也已命擇國子監生有學行者十六人
俾翰林嚴試拔其尤者授六科尋擢爲給事中宣宗嗣
位下求賢詔出徂製猗蘭擢招隱詩賜大臣敕朝臣三

品以上各薦所知已大臣奏蘇州等九大郡號劇煩難
治擢郎中況鍾莫愚御史何文淵員外陸本深等知蘇
常溫吉安等府上特召見晏勞焉是時重舉官大臣奏
舉賢能官者上爲降辭色慰藉之而廷臣選拔無薦舉
則降敕責焉至于各司府州縣官亦得舉賢良方正一
人已合臨御來三科進士親試文華殿懷其尤授修撰
編修評事官進學文淵閣優待之命內閣考在外庶官
之有文學者六十人拔其良七人歷事六科而天下郡
縣學生員年四十五上者考選送國子監令及時進用

其鼓舞人才之意盎然備矣正統初議者言府州縣正官專保舉則恩出于下宜循洪武永樂初制歸吏部選除大學士揚士奇言往藩憲二司及府州縣官不得人為百姓患苦蓋以吏部權衡獨擅聞見不廣未盡得人故也宣宗皇帝救命大臣保舉比多得人凡所舉官皆吏部審擇具奏得俞旨乃授非上允不得授恩固上也奈何輕聽人言而改易焉于是詔保舉如故而嚴舉官連坐之令已又敕曰牧民官縣令最親必得人而後民乃安目今進士觀政一年監生坐監三年以上有學

識者由吏員入官歷兩考廉慎愛民者科道官各保舉以聞送吏部銓用又命在京四品及國子監翰林院並得舉其慎重守令如此後王振用事雖名保舉而進退人才權遂內移于中官自是邪正例置賄賂公行景泰初大臣保舉者多私所親故為養交甚且有受賄囑而不得薦者因缺望為流言銓部大臣亦以銓選之權不盡由己也籍籍非保舉于是御史張子初練綱等言御史從大臣保舉而任則大臣有過必鉗口卷舌而不敢言其有請囑必俯首帖耳而不敢異願停之以清弊源

下部議部是御史言已而綱復言吏部選受私舛議復保舉而大臣以其議偏反無足錄也覆上下制曰朕期方面郡守得人令大臣保舉吏部推選乃彼此相蒙官不得人今惟布政按察使闕令三品以上會舉餘吏部訪求著爲令時長銓衡者王文端直留意人才委任僚屬凡御史出巡歸者令報其優劣以備簡用繼之者王忠肅翱亦嚴加考察公銓注杜請託自是奔競之風爲之一息英皇復辟曹石怙奪門功權威熠奕一時冒勲陞秩者四十餘人則名器之濫不問可知自乾綱獨奮

而其時內閣李賢亦盡志匡翼朝啓夕沃于是令冒職者自首免愆不數日閒盡歸釐正臺閣爲之一清會重修通志簡擇儒臣而禁苑襍流摧顏外補至是舉數年闕甘之風掃飭殆盡然僅罷郡守以下會舉例而兩司方面猶行保舉至是賢始奏令方面官闕吏部務推舉二人請旨簡用永遵爲例由是銓部得舉其職成化中選授私舛頗請復保舉于是命京堂四品以上官具闕上而親簡除之已而權密下移而傳奉出于中官宦官汪直梁芳等相繼用事引用方術一時朝列無有匡救

之者故有紙糊三閣老泥塑六尙書之謠孝宗改元舉
傳奉官悉革而首擢王恕掌銓衡恕裁抑僥倖褒獎名
節甄拔淹滯中貴無敢請謁者六年以後頗多內降官
益冗時太宰屠滹執奏謂天下士事詩書而躬案牘充
銛鋒而竭筋力積數十年不可得官而白身之人乃或
奔競佞幸如拾芥非振飭官方之軌也且今之傳奉卽
漢西園之爵庸斜封之官宋內降之批也其爲政體累
不淺矣時孝宗御極已久益卬習機務勵精治平每至
進片人臣恆坐煖閣召冢宰及學士等反覆密諭求其

允當而馬文升以人才缺乏宜加培養議開行人博士
兼除科道之例正德初許進掌銓政取人先行檢氣節
而後才藝于抑奔競杜請託尤嚴論者謂選法之公自
王端毅以來一人而已時逆瑾竊威福自宰輔以下多
阿意承之進獨正色不倚一切請託泥不行而有賄瑾
致囑者瑾亦往往難之以故在當時猶能自行其使紀
綱不至大壞已而張綵驟躡太宰依倚閹黨賣官鬻爵
名器侈濫至文事則委之劉宇武事則委之曹元紀法
紊替不可勝言未幾世宗立凡正德閒巧立名色陞授

者三千一百九十九員盡行革罷七年給事中陸燾言
選用行政及奏保旌異專重進士若舉人監生有賢能
者宜取併用教職之選往時所重比來甚輕有志者多
不樂就乞于教有成績者陞擢其歲貢仍復舊規府學
一年二人州二年三人縣一年一人通命坐監讀書以
中選取教職王府官終身不遷有厭薄宗室之意自今
乞選有學行者爲之秩滿一體遷轉邊方長吏視內外
尤重今有願就遠方之例實徇苟祿者之私又考察不
及者類調省是薄其民而以不肖治之也宜精擇良吏

優其遷擢又陳四事曰允任使慎考察汰冗官復制科
帝以其言有可采下吏部施行唯制科報罷九年保定
巡撫錢如京言京畿地重請銓進士爲守令不宜濫授
歲貢上曰前屢詔所司隨才任用不拘資格但有治行
宜民者一體擢用茲所議似特重進士而視歲貢太輕
令人何以自奮宜申明前旨行十年吏部奏曰祖宗求
才圖治之法不限一途歲貢不足則求之科目科目不
足則又求之薦舉夫薦舉者有人才則又取之有孝廉
則舉之有儒士有秀才則舉之有賢良方正則取之懷

才抱德經明行修則取之故薦舉一途比之科貢二途
得才最廣三途並用然後天下之人才得以乘時並進
而野無遺賢詔從之其後土木禱祠之事作國費不給
而度支將作二曹至增納銀事例鬻官賣爵幾同賈術
加以大臣婪資美遷隆秩往往以私賄得通則當日謁
贊者不能辭其咎焉隆慶時大學士高拱兼理吏部究
心人才掊破資格時天下重制科輕科貢拱曰天下制
科處其三科貢處其七是崇其三而棄其七也乃疏請
唯賢是視不計科貢又舊例除吏事其善地多留而不

除名曰養闕拱曰民方無主何以留爲于是命選司凡
有闕卽揭諸門外使眾共見人服其無私焉萬歷初制
朝覲考察汰黜者以其公議僉詳故屏棄不齒若歲時
因言官論糾及言事被譴者撫按官得保舉擢用迨半
年稍爲倦勤章奏度閣選擢壅滯考選之命致曠時不
下吏部內閣屢煩催請以致九卿虛列州縣官至有八
九年不得轉或幸得一轉而又以原任掛議去者在籍
者不無稍有約結之嘆至啓禎之際情面賄賂公行銓
選益不可問矣大抵明世用人之途蓋三變云往在洪

永閒天造草昧士各以所長自奮時蓋有其人而無其格宣正成宏文教大興士品乃定大僚鉅任多出制科之選而負奇韞珍者亦閒緣它途以起時蓋有其格而未嘗定其人嘉隆以來制科益重縉紳大夫十九其人其以貢科起者卽有長才異能多束于資不得表見時蓋格愈嚴而人始病崇禎時雖極力挽之而錮疾已深牢不可破夫朝廷之意亦嘗欲拘攣之見恢登進之途然竟未聞殊異之才足以越常調而稱意指者其故何也愚以爲上之所以求賢與下之所以應上者兩任其

過云

學海類編


三

卷之三

三

事功

學海



程